


B

R3132a




K-5-31
2



B

R3132a



Digitized by the Internet Archive
in 2012 with funding from
University of Illinois Urbana-Champaign

Ambrosio Fortunato d'
IN FUNERE

ILLUSTRISSIMI ET REVERENDISSIMI

D. D.

ANTONII REDETTI

EPISCOPI BERGOMENSIS

COMITIS &c.

ORATIO

HABITA IN ÆDE CATHEDRALI

IDIB. MAJ. ANNO CIOIOCCCLXXIII.



BERGOMI,

* * * * *

Ex Typographia FRANCISCI LOCATELLI.

SUPERIORUM PERMISSU.

Di Giuseppe Pizzi R. di Bergamo

B.
R3132a

(III.)

EMINENTISSIMO ET REVERENDISSIMO

D. D. JOSEPHO PUTEOBONELLO

S. R. E. C A R D I N A L I

ECCLESIAE MEDIOLANENSIS ARCHIEPISCOPO &c. &c.

ANTONIUS DE AMBIVERE COM. CAN.

F. P.



N parentalibus a nostro Collegio solutis Antistiti benemerentissimo, & summa tibi necessitudine conjuncto ANTONIO REDETTI, impositum mihi dicendi onus libens, & mærens suscepi: ob communem enim nostrum casum magno conficiebar mærore; & perspicuum in tanti viri memoriam pietatis

ac honoris argumentum palam & ante oculos omnium ponere exoptabam. Sed quantum pro temporis animique angustiis ingenii & artis attulerim, nescio : obtinuisse tamen opinor, ut aliquam optimi Episcopi imaginem latinis coloribus adumbrarim. Hoc itaque, Eminentissime Princeps, qualecumque sit, tenuis ingenii mei opusculum ad Te advenit, ut summæ erga Te meæ observantiæ ac reverentiæ aliquod extet monimentum; idque pro tua in omnes suavissima indole, singularique in me tua tum Romæ, tum Mediolani perspectissima benignitate, humanissime excepturum, magnopere confido. Ita felicissimis tuis auspiciis, glorioso tuo nomine, tuaque gravissima auctoritate fulta & decorata oratio publicæ lucis periculum animose subibit. Cum vero pares pro tanta tua bonitate atque clementia gratias agere haud valeam; immortalem Deum obsecrare obtestarique pergam, ut Te, in quo omnium virtutum, operumque excellentissimorum laus omnino insidet, religionis præsidio, rei christianæ incremento, bonorum & studiosorum hominum felicitati ac patrocínio, beatum & incolumem quam diutissime servet.

Bergomi XII. Kal. Quint.


An. CIOCCCLXXIII.

O R A -



O R A T I O.



 Inania nostra vota ! o fallaces
spes nostras ! præstantissimo Ur-
bis Præfecto , civitate universa ,
frequentissimo populo , ante au-
gustum Agni immaculati thro-
num , humiles supplicesque obsecrationes la-
crymis intermixtas , solventibus , tunc ma-
gna nos spes tenebat , ut paululum adhuc
& nobis , & bono nostro publico Præsul no-
ster sospes & incolumis ab omnipotenti Deo
servaretur . O fallaces spes nostras ! Funebri
iste apparatus , lugubris cantus , moerentis
populi fletus , cæteraque funebria omnia ,

A 3

proh

(VI.)

proh dolor ! nobis fatis ostendunt , Antonium Redetti amantissimum , justissimum , piissimum vita decessisse . Eheu ! qualem & quantum Præfulem amisimus ! Amisimus , spectatissimi Viri , sapientissimum ordinis nostri Antistitem . Amisistis , ornatissimi cives , patriæ vestræ decus maximum & ornamentum . Amisit Diœcesis nostra pervigilem ac munificum Pastorem , fortem acerrimumque christianæ disciplinæ vindicem , custodem , judicem ; boni , studiosi , egentes , Patronum , Præsidem , Parentem amisere . In tanto omnium ordinum luctu , ego , qui neque usu fatis , & ingenio parum possum , quibusnam eloquentiæ subsidiis utar , quave verborum lenitate commune hoc nostrum vulnus permulceam ? Libentius profecto , Auditores , vestro in conspectu tacerem lugens : sed ad hæc funerum justa & solemnia cum tristes conveneritis , Pontifici nostro benevolentissimo postremis hisce observantiæ ac pietatis officiis parentaturi , quoddam veluti mœstitiæ vestræ solatium a me exposcentes ; dicturus accedo . Ad levandum enim aliqua ex parte afflicti animi vestri angorem , nihil oport-

portunius mihi videtur, quam tanti Viri res præclare gestas, virtutesque egregias, quibus plenissimum suæ vitæ curriculum ornavit complevitque, ea qua potero brevitate, distincte tamen atque aperte vobis exponere. At de quibusnam virtutibus, Auditores humanissimi, me nunc loquuturum existimatis? De iis ne, quæ vel angustis quibusdam finibus sunt circumscriptæ, vel sua sunt mediocritate contentæ? De iis amplissimis immo fert animus dicere, quæ propria fulgentes luce in sui admirationem vel invitos rapiant spectatores: Illis namque Antonius Redetti instructus fuit atque ornatus virtutibus, quæ optimum præclarissimumque faciunt Episcopum. Id Ego cum multis, neque fucatis, sed certis ac gravibus ostendero argumentis; vos Præsulis nostri merita eximia percipientes, jacentem animum parumper erigetis, & vobiscum taciti ampliori celebrabitis laude.

Inclyta & sublimis *Episcopi dignitas* tantam Martyri Ignatio admirationem movit, ut (a) *omni principatui potestatique supereminere, & imitatore esse Christi veri Dei, prin-*

(a) M. Ignatius in Epist. ad Smyrnenes.

(VIII.)

apicem Sacerdotum, imaginem Dei referentem, affirmare non dubitaverit. De Episcopo vero Nazianzenus & Basilius verba facientes (b) Angelum Dei, illustrem animarum custodem, candelabrum in Ecclesia Christi, magni Dei figmentum in manibus suis portantem, Deum hominibus conciliantem, columnam & firmamentum in domo Dei, terrorem hæreticorum, patriarcharum legum custodem, omnis novitatis hostem, sacri concilii apicem, & immortalis vitæ doctorem, copiose sapienterque eum esse docuerunt Hujus tamen cellissimæ dignitatis desiderium boni operis desiderium (c) dicit Apostolus; sed tot tantaque requiruntur merita, & animi ornamenta, ut non mediocris neque vulgaris virtus tanto oneri sustinendo omnino par sit. Cum enim Spiritus Sanctus Episcopos posuerit (d) regere Ecclesiam Dei, eos (e) salis lucisque nomine scimus etiam esse appellatos. Quid enim sale aptius, quo omnis condiatur cibus, omniaque a corruptione ferventur? Verum quomodo Ecclesiæ, & cœlestium ciborum, quibus ad sempiternam alimur vitam, Episcopum dixerimus condimentum, si excellentioribus virtutibus destitutus

(b) Nazianz. in Apol. 1. & Orat. de Laud. Athan. & in Fun. par., & in Exhor. ad Episc., & Bas. in Ep. LXI.
(c) Ap. Tim. I III. I. (d) Að. Ap. XX. XXVIII.
(e) Matth. V. XIII. & XIV.

tus sit, & quodammodo infatuatus? Quid porro luce pulchrius & delectabilius, per quam pro corporum natura, partiumque vel tenuissimarum superficie & dispositione, terrarum universa colorem ducunt, illuminantur, distinguuntur? Quodnam vero in Episcopo lumen reluxerit, quibusnam salutaris luminis radiis commissam sibi collustravit Ecclesiam, si præstantiorum virtutum propitia careat luce? Cum igitur sal & lux sit Episcopus, & ab ipso populi sint exemplo perficiendi, suavi virtutis sapore condiendi, divinaque illustrandi scientia; non solum a mortifera vitiorum labe, & ab omni haud rectæ vitæ suspicione eum vacare, consentaneum est; sed etiam, ut asserit Nazianzenus, (*f*) alios *omnibus antecedit virtutibus*, egregiæque doctrinæ facem præferat emicantem, oportet. *Omnes enim virtutes*, teste Hieronymo, (*g*) *sibi adeo coherent*, & arctissimis colligantur vinculis, *ut qui una caruerit, omnibus sane careat*; summaque earum est laus, cum ad vitæ integritatem atque innocentiam, exemplo cæteris, sibi ornamento universæ referantur. Quæ cum
ita

(*f*) Nazianz. in Apolog. I.

(*g*) Hier. in Epist.

ita sint , quis vestrum non videat , Auditores , qualis in Antonio requirebatur virtutum splendor & copia , ut altissimæ dignitatis suæ munus vel angelicis humeris formidandum , optime sustineret ? Quarumnam in te , clarissime Antoni , maximarum virtutum laus inesse , aut splendescere visa non est ? Tu a divina providentia Episcopus es jam æternis designatus consiliis , tu indole tam præclara , tu tanta ingenii docilitate refulges , ut vel ab incunabulis ad regendam , ornandamque Dei Ecclesiam jampridem constitutus videaris . Sed longius respicite , Auditores , & per singula nostri Redetti tempora discurrentes , quas vos non vidistis virtutes , cum illis , quarum fructum lucemque percepistis , comparate . Puerum videte in florenti fortuna a clarissima Veneta patricia gente Rhodigii natum , a puerilibus , quas ætas fert , ineptiis nugisque quodammodo abhorrentem , ingratum pueris silentium amare ; atque in templis pio libentique animo immorantem , pueriles mores ad ingenuam modestiam pietatemque componere . Pueritia vix dum egressum Patavii spectate ; ea ætate est , cujus
& mul-

& multæ sunt, & blandæ voluptatum vitiorumque illecebræ; in ea est urbe, in qua ob multam juvenum copiam eo undique studiorum causa confluentem, plurima sunt incautis adolescentibus proposita licentiæ pericula: ipse tamen, mirum! flexibili nihil concedit ætati, voluptati, licentiæ nihil; sed firmissimo solitudinis se muniens præsidio, utilioribus literis, ac veræ religionis officiis tempus omne, alter veluti in templo Samuel, solerter assidueque infumit. Comperta enim divini Numinis ad majora eum vocantis voluntate, laicorum hominum cœtus & lubrica nimium remissæ juventutis studia curasque devitat. Quæ illi voluptas sanctam cum religiosi viris inire societatem, & cum iis de optimarum artium studiis, ac de cœlestium rerum disciplina agere! Quæ illi voluptas non solum dulcissima consuetudine, sed communi etiam eorum domicilio diutissime potiri! Ita Apostoli (*b*) præceptum & tenuit diligenter, & studioso animo est executus: *nemo adolescentiam tuam contemnat, sed exemplum esto fidelium in verbo, in conversatione, in charitate, in fide, in castitate. Age nunc terrestris & jacens*

(*b*) Apost. Timoth. I. IV. XII.

cens philosophia, etsi nihil te hominum generi præstabilius, te nihil ingenuo homine dignius, nihil te homini melius prædicetur; etsi vitæ dux, virtutis indagatrix, expultrixque vitiorum, & laudandarum virtutum procreatrix dicaris, & quasi parens; tanta ne tibi aut virtus, aut gloria est, ut juvenum in oblectamenta proclivitate superata, juvenilem ætatem nondum præceptis fatis institutam tuis, tanta inter pericula, vocesque obstrepentium vitiorum, cum gravitate, cum modestia, cum senili maturitate conjungas? Nequaquam profecto: illi ipsi disciplinæ tuæ sectatores quamvis plura de te jactitent; etsi ætatum ingeniorumque moderatricem te dicant; sæpius aut pravitate, aut mentis cæcitate vitiis obruti factis negant, quod verbis iisque magnificis ostentant. O curvas ad terras animas, cœlestiumque rerum inanes! Divinæ id quidem opus fuit gratiæ, quæ in Antonio vacua non fuit: illa enim, quæ omnium benefactorum, beneque dictorum vere una parens est, inter temporum vitia, inter voluptatum proposita irritamenta, inter ætatis discrimina, purum, integrum reddidit
& in-

& incontaminatum. Et eo ferme modo quo pluvia terris infusa accommodatum plantis vitalem suppeditat humorem, quem inter angustos tenuissimosque corticum meatus aliæ dulcem efficiunt, aliæ amarum, ac perpetuo-temperant motu; necessarias Pontificali muneri virtutes plena manu elargita est, in corde bono, & non ficto prima etiam ætate uberes edidit fructus. Nam liberalibus imbutus disciplinis, & doctrinæ ornatus insignibus non ultra suscipiendæ ecclesiasticæ vitæ vocationi obsistendum ratus, honorum augustæ patriæ spe omnino despecta, per inferiores gradus ad Sacerdotium ascendit. *Novum* exinde *hominem* (i) *novumque in Christo spiritum induisse* visus est: & divinam tunc sacerdotii dignitatem omnibus excolendam fulciendamque arbitratus virtutibus, ad sanctiorem vivendi rationem, meritorumque incrementum sedulam operam navat. Quanta cumprimis cœlestium rerum contemplatio? Quanta terrenarum contemptio? De altissimis meditari mysteriis, caduca omnia despicere in amore atque deliciis fuit. Hinc religionis cultus perdiligens, sollicitum liturgicarum rerum studium

(i) Apost. Ephes. IV. XXIV.

dium, ac ejus, quæ ad mores pertinet, difficilis scientiæ in ecclesiasticis, ut ajunt, congregationibus & academiis comparatio assidua. *Bonus Christi odor* (*k*) effectus fallaces lutulentasque mundi pompas libero quodammodo proterit pede; neque affluentibus divitiis, neque nominis amplitudine immoratur; sed quo majori ad cœlestia fertur ardore, eo magis terrena omnia fastidit; non secus ac rivus, qui florentes hinc inde ac peramœnas dedignatus ripas, tumidus præterfluit, & ad mare, unde, Salomone teste, (*l*) ortum habuit, continuo & imperturbato appropinquat cursu. Ea tandem tempora advenere, Auditores, quibus munifica Dei liberalitate, felicitas nostra compleretur. Abdicata enim ab amplissimo Viro Cardinali Portia Bergomeni Ecclesia, atque omnium nostræ patriæ ordinum exultatione, ejus in locum Antonius Redetti susceptus, Episcopus Romæ inungitur, & sacra manuum impositione suscepta, ad desponsatam sibi accedit Ecclesiam. O beatam Ecclesiam! o patriam fortunatam! Quænam Bergomeni Diœcesi florentissima ætas affulsit, qua sacra omnia curata

(*k*) Apost. Corinth. II. II. XV.

(*l*) Eccles. I. VII.

rata fuerint attentius, qua pietas melius cum doctrina consenserit, qua morum gravitas & honestas elegantius emicuerint? Hic quo propius ad Deum dignitate accessit, eo intensiori virtutum exercitio eidem studuit placere: & dignitatis (*m*) cum consideraret fastigium, jacentis deorsum abyssi faciem intuebatur, honoris celsitudinem cum attenderet, juxta periculum reformidabat, gradum cum consideraret, casum verebatur. Quamobrem virtutes, quas acervatim congeessimus, privatam inter vitam altæ atque educatæ in publicum Pontificatus lumen provectæ splendidissimæ coruscarunt; & quæ meritorum jacta fuerant fundamenta, in perfectam absolutamque corporis Christi ædificationem increvere. Ejusmodi igitur ex eo tempore vitam ab eo institutam vidimus, quæ dignitati quæ honori, quæ oneri, quæ labori penitus responderet; & qui lucem gregi pastumque præstíturus accesserat, tot subditis se vivere, quot præerat, cognoscens, earum est virtutum laudem adeptus, quas cum in gravissima suscepta provincia exerceret, oves intentæ pastoris vestigia persequerentur. Oratio maxima virtutum est; & ut cum Chrysostomo loquar (*n*)

cæte-

(*m*) Bernar. ad Eug. Episc. CXXXVII.

(*n*) Chrysost. Hom. XXVI. in A&. Ap.

(XVI.)

cæterarum omnium fons & origo, quæ hominem Deo arctissime conjungit, ad majorem excitat vitæ perfectionem, & in adversis, in dubiis, in arduis negotiis paratius, tutius præbet consilium ac perfugium. Tantum Antonius orationis studium arripuit, ut eam inter quotidiana etiam pastoralis muneris laboriosa officia diligentiori cura, quam jam ante instituerat, ad plures horas protractam extenderit, auxerit. *In cubiculo, & clauso ostio*, (o) *Patrem cum oraret in abscondito*, solum deprehendimus, & cum familia plus fletu, quam afflatu preces effundentem, atque in cœlestibus animo adeo defixum, ut vel familiaribus ipsis hospes plerumque in terris ab se & mundo alienatus videretur: præclarumque ejus ex ore Apostoli monitum persæpe audivimus: (p) *fratres orate, sine intermissione orate*. Ex oratione quam pura emanavit religio! Rem divinam incredibili exteriori modestia, animique admirabili attentione quotidie facit: ad eam, & ad omnia sacra peragenda mysteria, prece se comparat proluxa. Quisnam rituum & cæremoniæ observantior? quæ gravitas! quæ maje-

(o) Matth. VI. VI.

(p) Apost. Thessal. I. V. XVII.

majestas ! Ad pietatem , ad fidem , ad summi Numinis reverentiam ipsius corporis compositione excitat intuentes ; & alter veluti Moyſes ex congressu sermonis Dei , quamquam cœlestis Numinis aliorum oculis (*q*) radios non exhibeat , fidei tamen ac religionis splendore præfulget . Cæteræ vero virtutes tanta in religione possunt ne desiderari ? ex ea emergant , oportet . Quam , jubente Apostolo , (*r*) in domo sua instituenda moderationem non ostendit ? *Eam ne* (*f*) *decer sanctitudo , decet honestas* ? ita domum suam , familiamque composuit , ut in alios , qui foris sunt , sanctioris veluti disciplinæ inde exempla manarent . Vidistis domus universæ apparatus inutili pompa carentes ; in vestibus munditiam vidistis neque odiosam , neque nimis exquisitam ; vidistis in supellectili mediocritatem recte servatam , nec quidquam pretiosum , quod Christi sectatorem dedeceret ; vidistis tenuem & frugalem mensam vulgari modo paratam atque instructam ; vidistis familiares & servos ad humanæ vitæ subsidium & dignitatis ornamentum necessarios , probitate potius quam pompa spectandos,

B

(*q*) Exod. XXXIV. XXX.

(*r*) Timoth. I. III. IV. & Corinth. I. XIV. XL.

(*f*) Bernar. Lib. IV. de Conf. ad Eug.

)(XVIII.)(

dos, atque ita ordinatos institutosque, ut religiosorum hominum cœtus propemodum esse viderentur. Parem etiam exteriori interiorem adhibuit moderationem; quamvis enim irreprehensibilis vitæ innocentia, optimique pastoris vigilantia, exemplo & admiratione omnibus esset, laudes tamen plaususque defugiens, sibi uni veluti iners & ineptus nunquam placuit: atque illam, quam ab honoribus & divitiis proficiscentem, ignarum vulgus magnam in terris existimat felicitatem, tantum a se propulsare studuit, quantum ambitiosus hominum quisque avidè eam apprehendere conatur. Hinc quam mira mansuetudo! cum subitis ejus natura obnoxia concitationibus esset, insurgentes animi motus insigni virtutis contentione compressit; & adversarios infestosque homines, a quibus interdum conflictatus molestiis, injuriisque laceratus, amplectitur humanissime, ac suo ære sustentat. Hinc humanarum actionum moderatrix prudentia fuit pontificali ejus munere plane digna. Hinc justitia virtutum omnium domina & regina clarissimum assequuta est splendorem; tenacemque boni propositi

positi virum nullus favor, nulla gratia, nulla humana auctoritas, nulla denique officia potuerunt a recta sententia dimovere. Omitto hic, ne meus ad multum diem producat sermo, animi constantiam & fortitudinem: quam enim constanter sanctas leges custodiverit, quam fortiter sua jura pro justitia defenderit, vos ipsi scitis. Illam silentio prætereo patientiam, qua divinæ adhærens voluntati, tot morbos diuturnitate & acerbitate gravissimos toleravit: vos enim, qui ejus necessitudinem ac familiaritatem coluistis, locupletissimos habeo testes. Illa modo a me enarrari exposcit singularis in pauperes beneficentia & misericordia, quæ, teste Chrysostomo (t) salutis præsidium est, ac fidei ornamentum, quæ justos probat, sanctos roborat, Dei cultores ostendit. Quasi (u) omnium pater ipse vivebat omnibus, deerat nemini, expanso omnibus gremio pietatis, de quacumque tribulatione clamaretur ad eum, propriam reputabat. Quos inopes non complectitur? quos mendicos mirifica cordis amplitudine non suscipit ac recreat? Egentibus omnibus, verecundis, advenis, indigenis, peregrinis pro-

(t) Chrysost. sup. Matth.

(u) Bernar. Serm. II. de S. Malach.

priæ domus fores , ipso jubente , jugiter patent . Familias omni destitutas fortuna apud se fidelibus commentariis recensitas habet , quarum indigentiam occultis sublevare subsidiis , aliis cibaria vestesque , his statutam pecuniam , pluribus omnia ad honorem , ad honestatem , ad bonum nomen tuendum necessaria subministrat . Tanta præterea Pontificis nostri fuit erga pauperes liberalitas ac munificentia , ut non solum tamquam bonorum Ecclesiæ dispensator , non dominus , maximam reddituum partem in eos singulis annis erogaret ; sed etiam hæredes ex asse tabulis instituerit extremis . Ad se meam orationem rapit ingens illa , qua semper erga suum gregem efferbuit , sollicitudo . Tuæ , optime Pastor , industriæ in agendo , tuo consilio in providendo , tuæ in conficiendo animi firmitati , earum , quas modo videmus in tuo grege , virtutum fertilitatem ubertatemque debemus . *Sollicitudinem* definit Angelicus (x) *adhibitum studium ad aliquid consequendum* : quem vestrum latet , Auditores , ubi de populi sibi concrediti salute ageretur , quantum diu noctuque , & opera & verbo ad æternam

(x) Thom. II. II. LV. A. VI.

ternam omnium felicitatem elaborarit? Sanæ doctrinæ propugnator & vindex hæretica pravitæ corruptos ad catholicam fidem adduxit: idque maxime enituit in viro illo Boruffo (γ) amplissimo loco nato, quem, ne ultra seduceretur, domi suæ excepit, in catholicam communionem paternis cohortationibus, firmissimis argumentis, summa omnium lætitia rite solemniterque adscivit; atque, ut quam fieri posset, honestissime viveret, de suo rerum omnium copiam suppeditavit. Alios præterea contradicentes arguit, infirmos alios in fide corroborat, & se ipsum virtutum omnium præsidio ad fidei christianæque disciplinæ tutelam firmissime præmunit. Alterum veluti Moysem iterum conspiciat, tabernaculum crebro intrantem (ζ), inde exeuntem, ut a Deo discat intus, quod populum foris edoceat. Quoties enim in hoc templo privatoque sacello, aliisque sacris ædibus concionantem non audistis? Hoc ipso fortasse, quo loquor, momento, ejus monitis præceptisque vestræ adhuc aures patefcere videntur, quibus tum Dei cultum & ecclesiasticis legibus obedientiam, tum superioribus obsequium & domesticis curam,

B 3

tum

(γ) Joan. L. B. Bandel. VVoibmendorff.
An. MDCCXXXVII.

(ζ) Levit.

tum inimicis gratiam & miseris opem, sinceram denique omnibus ex corde dilectionem Patrum doctrina, evangelique veritate vobis nunquam destitit inculcare. Quemnam vero in Pontificio munere adimplendo non subivit laborem? quænam opera quamvis gravia & formidanda sibi non imposuit? quænam propriæ dignitatis ministeria perpetua licet & perquam difficilia recusavit? Quis tandem optimi Præfulis nostri sollicitudinem laudare pro dignitate satis commode possit? Nihil profecto inexcogitatum omisit, nihil intentatum, quod vel ad christianam disciplinam reducere, vel in ea Vos retinere posset. Enimvero cum *Episcopus* sit, ut ait Augustinus, (*a*) *populorum observator, custos & præfectus; speculetur, & subditorum mores vitamque prospiciat, necesse est*. Etenim ejus oculi magnam vim habent, ut in domo Dei incolumia sint omnia & salva. Re tanta a vigilantissimo Antistite cognita atque perspecta, incredibile est, quanta animi fortitudine, quanto mentis ardore perarduum hoc opus curaverit atque confecerit. Jam privatis publicisque auspiciatus precationibus urbis & Diœcesis lustrationem orditur: jam in Urbe ac subur-

(*a*) August. de Civ. Dei C. IX.

suburbiis, qua late patent, omnes rite invisit Ecclesias. Cum plerique vitiiati homines liberio-rem quam agunt vitam, depravatis interdum ecclesiasticorum moribus obtegere soleant; in sacros ministros præsertim inquirat. Utrum ne a sanctis legibus, a provincialibus statutis, a synodalibus decretis discedant, quam solertissime explorat. Tepentes inflamat, ad rectam viam reducit errantes, ad sacrorum frequentiam, populique salutem accendit: si quæ in eos culpæ irrepperunt, humanissime emendat, ac expertus veluti medicus non acriora primum, sed leniora pro morbi acerbitate magis opportuna admovet remedia. Alia ecclesiasticæ disciplinæ capita restituit, alia servanda proponit, omniaque percommotis sanctionibus pro rerum temporumque conditione ac varietate præscribit. His igitur in urbe suburbiisque optime absolutis, ad reliquas visendas diœcesis Ecclesias admirabili properat celeritate. Vos testes appello, qui præfuli nostro comites in tanto ac tam difficili negotio fuistis. Sed quid? pro omni laude res ipsa loquitur. Bergomen- sis nostra Diœcesis admodum vasta est, ipsius- que tres partes prærupti occupant montes, &

quibusdam locis aspera adeo est & angusta, ut commeare multum laboris ac periculi sit. Restitit ne bruma aut æstu deterritus, vel periculo permotus, gregis sui amantissimus Pastor? Natura etsi esset ac valetudine imbecillus; unius pagi visitatione peracta, continuo ad alium iter accelerat. Fatigatus, viribus fractus vix sibi quietis momentum relinquens, sacram adit ædem; ad convenientem populum sermonem habet. Pravas objurgat consuetudines, & faciles labendi causas; procaces amores, computationes, discordias, pessimam obtrectandi blasphemandique licentiam, omnia denique flagitia & scandala redarguit, accusat, infectatur. De fidei elementis rudes interrogare, patienter audire & docere, filios parentibus orbatos, viduas, ægrotantes, pauperes inquirere, iisque munificentissime opitulari, inquinatos homines pœnitentia expiare, cœlestem cibum populo ministrare, sacroque confirmandos inungere chrismate, præcipua cura est & cogitatio. Quam inter dissidentes pacem non conciliat? Quo animo contumaces non increpat? Quot perditos homines ad rectæ honestæque vitæ rationem cape-

pessen-

pessendam suavissimis etiam non incitat ver-
 bis? Solers veluti agricola, qui felices non so-
 lum colit arbores, sed illis etiam, quas ali-
 quod infecit vitium, adminicula, quibus re-
 gantur, addit; alias, ne ramorum luxurie pre-
 mantur, circumcidit, quasdam vero loci vitio
 exarescentes nutrit, quibusdam incommoda
 laborantibus umbra aperit cœlum, plures inu-
 tiles sylvestresque propagine ditat feliciori, o-
 mnibus pastorem, parentem, medicum, pa-
 tronum, amicum, omnibus omnia factus, au-
 xilio, subsidio, præsidio se exhibet atque de-
 monstrat. Dies me deficeret, Auditores or-
 natissimi, si in grege visendo admirabilia om-
 nia ab eo peracta in medium proferre vel-
 lem. Quemadmodum fructuum copia & sua-
 vitate arborum felicitas ubertasque declaratur;
 ita rebus omnibus tam præclare gestis opti-
 mus dignoscitur cultor animarum. Istarum ta-
 men periculum dies noctesque cum vereretur;
 mirum, quam validis custodiis, quam firmis
 præsidiiis, earundem salutem constanter fa-
 pienterque muniverit! Egregios viros accersit
 in curarum suarum vicariam procurationem,
 prudentia, scientia, gravitate præstantes. A-
 grico-

gricolas vineæ Domini tamquam providus paterfamilias integerrimos eligit, & adeo consultus, ut neminem nisi digniorem deligere consueſcat, quemque morum integritate & ſana doctrina conſtet præluere.

At quid de cæteris ſacerdotibus dicam? hos a comeſſationibus, a ludis, a venationibus, a ſpectaculis, iisque omnibus, quæ mundi licentiam olerent, voluit abſtinere: & ſicuti dignitate laicis præcellunt, ita honeſtate ſanctarumque virtutum nitore illis antecellere, conſtantiffime voluit. Quemadmodum, teſte Chryſoſtomo (*b*) *acceſſitus ab egroto medicus primum vitia ſtomachi perdiligenter exquirat, eumque componere feſtinat, quia ſi ſtomachus ſanus eſt, firmam inde corporis habitudinem exiſtimat; ita ſi ſacerdotium integrum fuerit, tota floret Eccleſia.* Huc referebantur Antonii conſilia, huc ejus ſtudia præſertim ſpectabant. Cumque initia proſectusque virtutum a prima educatione pendere, ac idoneos Eccleſiæ miniſtros non niſi ex optime inſtitutis adoleſcentibus fieri poſſe cognoſceret; in id omnem contulit curam, ut addicti Eccleſiæ juvenes literis ac pietate, majori qua fieri poſſet
ſet

(*b*) Chryſoſt. in Matth. XXI. Hom. XXXVIII.

set diligentia, informarentur. In suo Seminario, quod semper in deliciis habuit, probatos tantum excepit, exceptosque, ut meliores fierent, præceptoribus probitate ac doctrina electissimis tradidit instituendos. Qua non exploravit industria eorum mores, indolem atque profectum? Quibus artibus eorum non excitavit studia? Qua solertia non investigavit, utrum ordinibus initiandi cæco ineuntis ætatis impetu, ac honoris commodive gratia, an vero divino afflatu Ecclesiasticæ militiæ nomina darent? *Nemini cito*, prohibente Apostolo, *manum imposuit* (c): nemo unquam ex candidatis in sacrorum ordinum petitione eum ambire potuit. Dic fodes, qui hic ades, adolescens, potuisti ne unquam tuum Præsulem circumîre? alienas immo commendationes tuæ petitioni impedimento magis quam subsidio fuisse, cognovisti; attentissimus enim in id perpetuo vigilavit, ne insidiis vel arte, aut dolo caperetur. Cum vero nihil sit, quod magis ad pietatem laicos impellat, quam eorum exempla, qui divino ministerio se dedicarunt; neminem, qui christianas virtutes non redoleret, rectæque vitæ normam haud præferret, ad divinam
sa-

sacerdotii dignitatem admisit, nedum est pas-
 sus ad sancta accedere ministeria. Verum,
 Auditores, satis ne habuit præstantissimus Pon-
 tifex tanta cum utilitate Diœcesim lustrasse,
 subditorum licentiam coercuisse, clerumque
 composuisse universum? Ad sacras Virgines
 etiam, illustrem sui gregis partem, curas ani-
 mumque convertit. Iis graves probatæque vir-
 tutis viros præfecit, ad regularem disciplinam,
 ad propria cujusque officia omnino confor-
 mavit, ad mutuam charitatem, & amorem
 Sponsi Jesu vehementer accendit. Animo de-
 jectas erexit, excitavit remissas, omnes deni-
 que ad paupertatem, obedientiam, modestiam &
 solitudinem, cæterasque, quæ sacris præsertim
 virginibus consentaneæ sunt, virtutes, amantif-
 simis cohortationibus inflammavit. Omnes ip-
 sarum ædes quasi hortum conclusum, suæque
 fidei commissum, interiori exteriorique cultura
 excoluit, custodivit: alias aluit, aliarumque San-
 ctissimi Salesii imitator foundationem promovit,
 adjuvit, perfecit (*d*). Quid tandem plura, Audi-
 tores? necdum Antonii opera egregia satis per-
 fecta sunt atque cumulta? quorsum ego tot hac
 in oratione congero laudes, cum luce clarius pa-
 teat,

teat, eum omnium virtutum fulgore & condimento fortunatam Ecclesiam nostram illustrasse fauste, & suaviter condivisse; optimum idcirco præclarissimumque Episcopum ab omnibus esse prædicandum? Estne, quæso, in hac urbe, vel provincia locus, in quo tantarum virtutum non effulserit lumen, quique perpetuis non personet præconiis? Celebrantur Edicta, quæ ad universi gregis salutem alia aliis temporibus promulgavit; laudantur Decreta, quæ ad disciplinam servandam aut restituendam sancivit. In cœlum tolluntur gravissimæ illæ Pastorales litteræ singulari pietate ac virtute refertæ, quæ vel unæ Episcopatus munere optime perfunctum esse testantur. O nostra tempora memoria sempiterna plane digna; quibus celeberrimorum Præsulum eximia opera reddita & expressa non solum vidimus, sed summo etiam nostro bono potuimus experiri! Vos vos Antistites beatissimi, qui pervertistam hanc rexistis Ecclesiam, huc adeste, & vestra hoc in loco primum impressa gloriosa vestigia, contueminor, quo modo Antonius sit nostra ætate persecutus. Sed quidnam, Auditores? dum amplissimi Pontificis nostri admiramur virtutes; mors ejus luctuosa, in cujus squalore ac
moero-

mœrore versamur, ex animo pene excessit. O fluxas hominum spes! o infelicem illum diem! o miseram conditionem nostram! In hac uberrima meritorum segete, in hac spatiosa virtutum emensa via, post diuturnos & graves labores, ex laterum primum infirmitate, & virium defectione, magnis postea accedentibus febribus, ea qua semper in adversis fuit, magnanima constantia patienter toleratis, paratus instructusque, Dei ope implorata, in Sacerdotum complexu ad immortalitatem evolavit. Quantus per id temporis in civitate populoque universo, & quam incredibilis mœror! sed in majori quidem nos fuimus luctu, quam ipse in timore, cum se brevi migraturum cognoscens, suis rebus consulens, seque alacri animo ad æternitatis iter rite capeendum comparans, proh dolor! est nobis ereptus. Eheu! ereptus, est, nobisque tanta in ægritudine præstantissimarum omnium virtutum memoriam, sui que desiderium reliquit. Luctus ubique ingens, inopum miserorumque ploratus, lugubris virorum ac mulierum lamentatio, omnium ordinum ætatumque subita commotio. Multitudo frequentissima ad

Pon-

Pontificias convolat ædes, carissimi Parentis faciem extremo visura: ipsius desiderium lacrymis gemituque testatur, & gravissimi infortunii acerbicatem, ac nunquam intermorum dolorem, miseranda significatione declarat. Cecidit, ah! cecidit, alternantibus hinc illinc, pressis ac flebilibus vocibus referunt omnes, cecidit fortissimum Religionis columen, occidit clarissimum Ecclesiasticæ dignitatis lumen, communique mortalium fato cessit optimus patriæ nostræ Episcopus, indigentiae subsidium, pietatis & studiorum patrocinium, virtuti adjumentum, omnium nostrum amantissimus Pater. O me miserum, cui hæc tristitia commemorare necesse est. Vos spectatissimi Collegæ, qui hæc justa persolvitis, vos Auditores ornatissimi, qui supremis hisce parentalibus adestis, jure ac merito jacetis afflicti. Sed a mœstitia parumper recreamini; benemerentissimus enim noster Præsul, qui sanctissime vivens quadraginta & tres annos hanc gubernavit Ecclesiam, ut sperare par est, in beatis cœli sedibus æternum vivit, atque eadem adhuc urbis & provinciæ nostræ apud omnipotentem Deum nobis con-

jungi-

jungitur cura ac cogitatione: ac ne tot vigiliis laboribusque exulta Ecclesia Pastore, qui sibi met similis sit, destituatur; felicibus precibus exorat. Vos igitur tot virtutum memores & beneficiorum, optimi nostri Episcopi memoriam grato animo prosequimini, eumque, cujus inclyta admirati estis merita, vehementer adhortor, ut veluti exemplar, quod constanter imitemini, vobismetipsis proponatis.

F I N I S.





UNIVERSITY OF ILLINOIS-URBANA

B.R3132 A C001

In funere illustrissimi et reverendissim



3 0112 089345604